

Visoki predstavnik se obratio Vijeću Sjeverno-atlanskog saveza i Vijeću za evro- atlansko partnerstvo

Visoki predstavnik, Wolfgang Petritsch, u Briselu se danas obratio Sjeverno-atlanskom vijeću (NAC), najvišem organu NATO-a koji donosi odluke.

Visoki predstavnik je izrazio zahvalnost NATO-u i SFOR-u za obezbjeđenje sigurnosnih okvira unutar kojih se vrši implementacija mirovnog sporazuma u Bosni i Hercegovini, te je istakao efikasnu i kontinuiranu razmjenu informacija između vojnih i civilnih struktura zaduženih za implemetaciju mirovnog sporazuma u BiH. Također je naglasio potrebu za nastavak SFOR-ovog angažmana. "Postoje neki koji smatraju da je došlo vrijeme da međunarodna zajednica pakuje kofere i ide", naveo je Visoki predstavnik. "Poruka koju vam danas upućujem je da to vrijeme još nije došlo – otići sada značilo bi preuzeti rizik da ova država, koja je u srcu Evrope, doživi neuspjeh". Dodao je da je "osposobljenost važna, a ne brojnost", te potvrdio da će "NATO procijeniti koliko je trupa potrebno da bi se ispunio ovaj zadatak".

Sumirajući napredak ostvaren u provedbi mirovnog sporazuma, Visoki predstavnik je rekao NAC-u da se u posljednje dvije godine više od 130.000 izbjeglica i raseljenih lica vratilo u mjesta gdje predstavljaju manjinske etničke skupine. Naveo je da ukoliko se taj trend nastavi, "većina preostalih izbjeglica i raseljenih lica koja žele da se vrate, moći će se vratiti svojim kućama do 2004. godine".

Razmatrajući ekonomsku situaciju, Visoki predstavnik je naglasio uspjeh konvertibilne marke koji je od izuzetne važnosti. Naveo je da je reforma bankovnog sektora provedena u 2001. godini imala pozitivne rezultate, te

je potcrtao potrebu za provedbom opsežne privatizacije u 2002. godini. Međutim, upozorio je da BiH ekonomski još nije izašla iz krize, pošto je stopa nezaposlenosti još uvijek visoka i siromaštvo je još uvijek široko rasprostranjeno.

Što se tiče političke arene, Visoki predstavnik je rekao da je dolaskom na vlast Alijanse za promjene napravljen ključni iskorak od nacionalizma ka pragmatizmu. Opisao je inicijativu koju je pokrenuo sa ciljem uspostave Partnerskog i Građanskog foruma i izrazio nadu da će ti forumi doprinijeti pozitivnim pomacima u politici, privredi i društvu. Visoki predstavnik je, međutim, upozorio da BiH ne može postati normalna zemlja sve dok su optuženi za ratne zločine, uključujući Radovana Karadžića i Ratka Mladića, na slobodi.

Visoki predstavnik je također naveo da pošto su se susjedi BiH, Hrvatska i Jugoslavija, okrenuli od nacionalističke politike i pošto se države na cijelom Balkanu okreću ekonomskim reformama i evropeizaciji, BiH ne smije ostati zapostavljena. Implementacija mirovnog sporazuma i ekonomski razvoj su pitanja od izuzetnog značaja kojima je potrebno hitno posvetiti pažnju. Ta hitnost se odslikava u procesu reorganizacije prisustva međunarodne zajednice u BiH i prebacivanja bitnih zadataka na domaće organe vlasti. "Mi se aktivno povlačimo i na bh. građane prebacujemo taj posao – preuzimanje odgovornosti za svoje vlastite obaveze i budućnost", rekao je Visoki predstavnik.

Opisujući promjene do kojih je došlo u oružanim snagama entiteta, kako bi se uskladile sa potrebama i resursima kojima raspolaže BiH, te kako bi se pripremile za učešće u programu Partnerstvo za mir pod okriljem NATO-a, Visoki predstavnik je iznio mišljenje da "SFOR i međunarodna zajednica trebaju nastaviti ulagati napore kako bi se u BiH uspostavilo normalno stanje u vojnim redovima, sa integriranim oružanim snagama." Naveo je da uloga SFOR-a u reformi oružanih snaga predstavlja značajan doprinos ukupnom razvoju BiH.

Visoki predstavnik se poslije podne obratio Vijeću za evro-

atlansko partnerstvo (EACP), multilateralnom forumu gdje se 19 država-članica NATO-a i 27 država-partnera redovno sastaju kako bi razgovarali o političkim i sigurnosnim pitanjima, kao i o razvoju saradnje. Visoki predstavnik je skrenuo pažnju na okvir za korisnu razmjenu informacija i iskustava između BiH i zemalja-članica EACP-a koje su već uspješno prošle proces tranzicije na tržišnu demokratiju. "Zemlje-članice EACP-a su u poziciji da dobro razumiju prirodu bolnog oporavka Bosne i Hercegovine", naveo je on. "Uz opsežne ekonomske reforme, političko vođstvo Bosne i Hercegovine ulaže napore u cilju bolje integracije u evropske strukture, a njene vojne strukture se spremaju za pridruživanje Partnerstvu za mir".